

Fokustyd 2022 - Week 5 : 26 – 2 Okt.

Tema: God se gesprek met Jona (en met ons).

Ons sluit vanjaar se Fokustyd af met 'n Ou Testamentiese perspektief uit die boek Jona. God se gesprek met Jona, sy opdrag aan Jona en Jona se reaksie daarop openbaar geweldig baie ten opsigte van ons tema: Stap saam met Christus oor grense na verlore mense.

Jona word na verlore mense gestuur. Maar wat doen hy? Hy weier en vlug weg. God gaan haal hom letterlik uit die dieptes van die see en onder dwang gaan praat Jona met die verlore mense! Tot sy groot ontsteltenis kom hulle tot bekering!! Op die ou end sit Jona baie onvergenoegd en stry met God oor sy optrede! Die boek Jona sluit af met 'n vraag van God aan Jona!

God se laaste vraag aan Jona word ook aan ons gerig! Sal ons soos Jona optree en weier om oor grense heen te stap! Of sal ons God se besorgdheid oor verlore mense ons eie maak en met hulle gaan praat? Dit is 'n vraag wat ek en jy persoonlik voor God moet antwoord.

BYBELSTUDIE RIGLYNE UIT JONA VIR HIERDIE WEEK EN SOMMER NOG SO BIEJTIE MEER.

Hierdie is 'n reeks van 8 Bybelstudies oor Jona wat jy/julle op julle tyd kan deurwerk. Dit gaan meer wees as wat jy/julle in hierdie laaste fokusweek kan hanteer. Werk dit rustig tot die einde deur en gebruik tyd om regtig diep oor die boodskap hiervan na te dink.

Ek gee erkenning aan prof F Deist uit wie se boekie (Die God van Jona) ek die indeling en fokuspunt aanduidinge geneem het.

MAAR VOOR ONS MET DIE BYBELSTUDIE VIR DIE WEEK BEGIN VRA ONS EERS VIR OULAAS:

1. Het die inhoud van jou gebede al verander sedert ons met ons Fokustyd begin het?
2. Wie se name is op jou lysie van mense wat jy in die afgelope tyd gedink het om mee 'n gesprek te voer? Onthou: een is genoeg!
3. Het jy al vir hulle begin bid en vir die Here gevra om hulle voor te berei en jou te help om jou gesprek met hulle te begin?

Indien ons nie hier begin nie, gaan ons nie regtig vorder nie! Maak dit jou erns om hierdie dinge in jou gebede te bring.

BYBELSTUDIE RIGLYN 1 – JONA 1: 1 – 3

Indeling van die boek:

2 hoofdele naamlik hf. 1:1 – 2:10
3:1 – 4:11.

Elke hoofdeel word telkens in 3 dele verdeel.

Hoofdeel 1 se driedeling:

1. Die eerste deel handel oor die opdrag van God en die profeet sy reaksie daarop
2. Die tweede deel handel oor Jona se reaksie op God se woord wat gekontrasteer word met ongelowiges se reaksie daarop.
3. Die derde deel handel oor God se verhouding met Jona - gebede vorm 'n belangrike deel hiervan.

Opdrag: Lees Jona 1: 1 – 3

1. Let op die kontraste wat in die verse geteken word om Jona se dwase poging om van sy opdrag weg te kom te illustreer:

Die woord van die **Here “kom” tot Jona** Jona maak klaar en “gaan weg” van die **Here**

Maak jou klaar (letterlik) “staan op” Jona “gaan af” – af na Joppe, af in ‘skip
Gaan **oos** na Nineve Jona gaan **wes** na Tarsus (Spanje)

2. Let op die verskil tussen Jona se probleem met die opdrag om te profeteer in vergelyking met ander profete wat soortgelyke opdragte gekry het.

Lees

Eksodus 3: 10 – 14

1 Konings 17: 1 – 5

1 Konings 19: 1 – 4

Jesaja 6: 5 – 9

Jeremia 1: 4 – 8


3. Wat kan ons aflei uit die feit dat die groot stad Nineve se sonde “opgestyg het voor” God se aangesig (Ou Vertaling)?
4. Wat kan ons aflei van Jona se Godsbegrip in die feit dat daar twee keer in hierdie verse gesê word dat Jona “weggevlug het van die Here af”?
5. Lees Jona 4: 2 . In watter mate is hierdie gebed van Jona 'n verswarende faktor ten opsigte van sy optrede in hf. 1: 1 – 3?

6. Hoe spreek hierdie verse tot ons as gelowiges vandag?

- Ten opsigte van ons siening van God se oordeel en genade.
- Ten opsigte van ons taak en roeping om die evangelie te openbaar.

7. Wat leer ons dus vandag uit die Woord van die Here?

Map showing the area covered by the mission of Jonah. (NBD p. 613)



BYBELSTUDIE RIGLYN 2 – JONA 1: 4 – 9

Lees Jona 1: 4 - 9

Interessanthede oor die tweede deel verse 4 – 16:

1. Drie maal word die woord “gooi” gebruik in vers 4,5 en 15 en telkens word ‘n belangrike gebeurtenis daarmee ingelei.

2. Die verhaal word so geskryf dat die fokus volkome op Jona val.

A Vertelling en vreesmotief (4 – 5a)

B Gebede van die matrose (5a)

C Vertelling (5b, 6a)

D Woorde van die kaptein (6b)

E Woorde van die matrose (7a)

F Vertelling (7b)

G Woord van die matrose (8)

BELYDENIS EN VREESMOTIEF – vers 9

g Woorde van die matrose (10a ,b)

f Vertelling (10c)

e Woorde van die seelui (11)

d Woorde van Jona (12)

c Vertelling (13)

b Gebed van matrose (14)

a Vertelling en vreesmotief (15,16a)

Bespreking:

1. Wat doen God in reaksie op Jona se “wegvlug” , sy weiering om die opdrag uit te voer?
2. Wat kan ons aflei van God se gemoedstemming in die woorde “sterk wind” of nuwe vertaling “kwaai storm” ? Vergelyk dit met die Here se optrede teenoor Elia in 1 Kon 19: 11 – 13. Wat is die verskil tussen die twee verhale?
3. Wat kan ons aflei van die matrose se “godsdiens” uit hulle reaksie op die storm?
4. In watter skrille kontras staan Jona se optrede in vers 5?
5. Wat kan ons aflei uit die woorde in vers 5 “en Jona het vas geslaap” (tardema). Lees Gen. 2: 21 en Rigters 4: 21 en Jesaja 29: 9 – 11. Watter metaforiese betekenis het hierdie “slaap” van Jona vir ons as kerk vandag?
6. Wat is die gevolge vir die wêreld as die kerk stilbly en nie haar roeping vervul nie?
7. Watter ironie lê daar in die kontras tussen die matrose/kaptein se optrede en die van Jona? Vergelyk Handelinge 27: 14 – 26.
8. Wat kan ons aflei ten opsigte van die taak van die kerk vandag in die lig van Paulus se optrede?
9. In watter geweldige verleentheid beland Jona (die kerk/ ons) in vers 8 toe die lot op hom val?
10. Tot watter “geleenheid’ lei die verleentheid in vers 9?

11. Was Jona se belydenis 'n goeie belydenis? Vergelyk die volgorde van die vrae van die matrose in vers 8 met die volgorde van Jona se antwoord in vers 9. Wat kan ons daaruit aflei van die egtheid van sy belydenis?

BYBELSTUDIE RIGLYN 3 – JONA 1: 10 - 16

Opdrag: Lees Jona 1: 10 - 16

Ons het verlede keer gesien dat Jona se belydenis in vers 9 die kernopenbaring van hierdie gedeelte is. Hy erken dat hy God dien maar sy optrede spreek die teendeel. Hy vlug weg omdat die God van die "Hebreërs" hom 'n opdrag gee wat hy nie wil uitvoer nie. Die opdrag pas nie in sy politieke en nasionalistiese siening van sake nie.

Die Here is egter besig met 'n plan en gebruik selfs Jona se ongehoorsaamheid om sy doelwit te bereik.

1. Jona se belydenis/getuienis was deurspek van sy eie sondige siening, maar was steeds 'n openbaring/ bekendmaking van die ware God. Jona gebruik hier die Verbondsnaam "Jahweh" vir God en nie die meer algemene naam "El" nie.

Hoe reageer die matrose op die bekendmaking van God se naam? (Vers 10)

2. Noem twee dinge wat hiet gebeur waaruit kan ons aflei dat Jona se getuienis van sy geloof en in Wie hy glo, nog nie 'n belydenis was dat hy besig is om verkeerd te doen nie'? Kyk na vers 11 b, 12, en 13.

3. Wat kan ons hieruit aflei ten opsigte van die krag/impak van Jona se persoonlike oortuiginge oor God se opdrag? Wat is hy bereid om te doen vir sy eie oortuiginge?

Hoe sou ons hierdie optrede vandag tipeer?

4. Watter struikelblok lê hierdie diep gewortelde oortuiging ten opsigte van die openbaring oor wie God is en wat Hy wil doen?

5. Watter diep gewortelde verkeerde oortuigings is daar dalk by ons teenwoordig wat God se opdrag en God se bekendmaking in hierdie wêreld kan verhinder?

6. Watter kontras is daar tussen Jona se begeerte om oorboord gegooi te word en die matrose se poging om die skip tog veilig aan land te bring? En wat sê hierdie optrede implisiet oor wie God is en hoe Hy optree?

7. Tot watter geweldige optrede bring Jona se volhardende sondige optrede en die Here se "agtervolging" van Jona die matrose in vers 16? Watter ironie lê daarin opgesluit?

8. Watter geweldige aanklag sit daar in die gebed se woorde "moet ons tog nie laat vergaan oor hierdie man nie"?

9. Wat dink u sit agter die matrose se volgende woorde in hulle gebed "iemand onskuldig doodmaak nie"?

10. Tot watter insig kom die matrose - met hulle kortstondige kennismaking met God – waartoe Jona nie kon kom nie? Vers 14 C. Wat beteken hierdie insig vir ons vandag?

11. Wat leer vers 15 ons van Jona? En wat leer dit ons van God?

12. Wat bewerk God in die matrose met die absolute stilte wat Hy oor die see bring?

13. Wat leer ons uit die feit dat Jona se ongeloof en vlug-optrede hom al hoe verder weg van God neem, terwyl dit die matrose al hoe nader aan God bring?

Waar hulle in eers gevrees het, het hulle nou ontsag vir God.

BYBELSTUDIE RIGLYN 4 – JONA 1: 17 – 2:10

Met die indeling van die boek het ons gesien dat die 2 hoofdele (hf 1:1 – 2:10 en 3:1 – 4:11) telkens in 3 dele verdeel kan word.

Die eerste deel handel oor opdrag van God en die profeet sy reaksie daarop

Die tweede deel handel oor Jona se reaksie op God se woord wat gekontrasteer word met ongelowiges se reaksie daarop.

Die derde deel – waarby ons vandag kom - handel oor God se verhouding met Jona en gebede vorm 'n belangrike deel hiervan.

Lees Jona 1: 17 – 2:10

Jona se afwaartse “weg-van-God-vlug-vaart” bereik nou sy fisiese diepte punt. Nadat die matrose hom op sy bevel oorboord gooi, stuur die Here 'n wondervis om Jona terug te bring uit die diepte van sy “geestelike val”.

Kom ons kyk net weer na sy afwaartse tog:

Van sy tuisdorp Gat-Gefer af na Joppe

By Joppe af op die dek van 'n skip

Van die dek van die skip af in die binneruim

Van die skip af in die diepte van die see

Van die diepte van see af in die onderwêreld van die dood

Hierdie geestelike val beskryf Jona in terme van die mense se wêreldbeeld van daardie tyd nl. dat die wêreld uit 3 dele bestaan het. Die hemel, die aarde en die water onder die aarde. Hierdie onderraardse deel is dan ook beskou as die doderyk – die plek waarheen dooies gaan om vir altyd daar te bly. Vir Jona het dit gevoel asof hy in die doderyk beland het en dat die Here die vis stuur om hom uit daardie “water onder die aarde” te kom uithaal.

Wanneer Jona dan hierdie fisiese en geestelike laagtepunt bereik begin hy bid. Vir die eerste keer wend Jona hom tot God. Jona se gebed is in Hebreeuse vorm 'n gedig wat in die klaaglieddigritme geskryf is. Ongelukkig kan ons dit nie in Afrikaans sien en waardeer nie.

- 1 Watter verband is daar tussen die **3 dae** wat Jona in die maag van die vis deurbring en sy afwaartse wegvlug van God af?
- 2 Jona se gedig word in die klaaglieddigritme geskryf en tog is dit 'n lof en danklied. Hy dank die Here vir die redding en Hy loof God dat Hy hom gered het. Was hierdie gebed 'n gebed van bekering?
- 3 Hoe kan dit met ons gebeur dat ons ook so ons lewe en ons gebede kan aanpas om by ons siening van sake te pas?
- 4 Wat kan ons aflei uit die woorde van vers 3 "U het my in die diepte gewerp...."?
- 5 Wat kan ons aflei uit vers 5,6,7 oor Jona se siening met betrekking tot sy bereidheid om vir sy saak te sterf (gooi my eerder oorboord) en die feit dat hy nou met die werklikheid van dood gekonfronteer word? Vergelyk dit met Handelinge 7 : 58 – 60.
- 6 Na wie verwys Jona in vers 8 a en watter klaaglike ironie is daar tussen sy gebed en die gebed van die matrose in 1: 14 – 16.
- 7 Ons lees in 1 : 16 dat die matrose na hulle bekering geloftes gedoen het. In 2: 9 maak Jona ook 'n gelofte. Watter aanklag sit daar in hierdie "gelofte" van Jona en hoe is dit dalk ook waar van die kerk van vandag? Lees Matteus 21: 28 - 31
- 8 Alhoewel Jona se gebed nie 'n ware bekeringsgebed was nie, hoekom het die Here nogtans sy gebed verhoor en die vis gestuur en Jona op droë grond teruggebring?
9. Christus verwys in Matteus 12: 38 – 40 na sy drie dae en drie nagte in die buik van die doderyk. Watter verband hou dit met die antwoord van vraag 8 en watter troos hou dit vir ons vandag in ?

BYBELSTUDIE RIGLYN 5 – JONA 3: 1 - 3

DIE OPDRAG HERHAAL

Lees Jona 3: 1 – 3

1. Watter ironie sit daarin opgesluit dat die skrywer pertinent noem dat die Here 'n tweede keer die opdrag aan Jona moet herhaal en wat leer ons daaruit met betrekking tot onsself?

2. Hoekom is dit nie maklik vir die mens om God te gehoorsaam nie? Selfs Jesus het na sy mensheid daarvan geworstel. Lees Matteus 26: 36 – 39.

3. Hoe verskil die bewoording van die tweede opdrag van die eerste een in hf 1: 1 – 2 en wat moet ons daaruit aflei van God se pad met Jona?

4. Watter diep Bybelse waarhede met betrekking tot God en sy siening van mense word geopenbaar in die verskil in bewoording van die opdrag? (Kyk die 1933 vertaling)

5. Ons het uit die vorige studie tot die slotsom gekom dat Jona, na sy diepste afdaling na liggaam en gees tog nog nie werklik tot inkeer gekom het nie. Dit blyk ook later uit sy reaksie op die gebeure in Ninev . Waarom dink u het Jona tog hierdie keer die Here gehoorsaam?

6. Nineve word beskryf as ‘n groot stad van 3 dagreise ver. Waarin moet ons die eintlike “grootte” van Nineve sien.

Vergelyk Genesis 10: 8 – 12 ; Jona 1:2 en 2 Konings 17 : 3 – 6.

7. In die lig van bogenoemde feit: met watter gesindheid was Jona op pad na Nineve en hoe verskil dit van God se bedoeling (sien vraag 4)

8. Hoe word hierdie siening dalk ook vandag deur baie mense in ons land en ons kerk gehandhaaf?

BYBELSTUDIE RIGLYN 6 - Jona voer sy opdrag uit Jona 3:3 – 3:10

Opdrag: Lees Jona 3:3 – 3: 10

Soos in die 2 de gedeelte van deel 1 (hf 1) word hierdie tweede gedeelte van deel 2 ook baie mooi simmetries opgebou om die kern van die verhaal vir ons aan te duif.

A Vertelling: Jona gaan in Nineve in (3:4 a)

B Woord van Jona (3:4 b)

C Vertelling: Nineve glo (3:5)

Woorde van die koning (3: 7 – 9)

c Vertelling: God sien Nineve (3: 10 – 4: 1)

b Woord van Jona deur God beantwoord (4:2 – 4)

a Vertelling: Jona gaan uit Nineve uit (4:5)

Die opbou van die verhaal se doelwit is om Jona se reaksie en die reaksie van die heidene met mekaar te kontrasteer. So ook woord die belydenis van die koning gekontrasteer met Jona se belydenis in deel 1 (kyk simmetriese opbou daar)

Nog iets merkwaardig is die feit dat Jona se prediking in B hierbo net uit 6 Hebreeuse woorde bestaan terwyl die simmetrie daarvan in b uit 42 woorde bestaan. 'n Mens sou kon sê dat Jona 7 keer meer te sê het oor die bekering van Nineve as sy oproep tot bekering. Dit openbaar iets van Jona se gesindheid. 'n Kort boodskap maar 'n lang relasie oor die kort boodskap geglo is.

Besprekingsvrae

1. In 3:3 is gesê dat Nineve so groot is dat dit 3 dagreise neem om daardeur te loop. Jona het slegs een dagreis ver geloop en die boodskap verkondig toe die heidene alreeds daarop begin reageer. Wat kan ons hier aflei oor die reaksie van mense op die Woord van God?
2. Watter ironie lê daarin opgesluit dat die boodskap die koning bereik voordat Jona die koning bereik?
3. Jona preek: "Nog veertig dae dan word Nineve verwoes". Wat het Jona met die prediking bedoel? Lees Genesis 19: 25 en 29 en Amos 4: 11.
4. Wat was God se bedoeling met die prediking? Lees Jeremia 18: 7 – 9.
Handelinge 2 : 3 en 4.
5. Wat was dus Jona se grootste denkfout oor God en hoe gebeur dit ook vandag in ons land?
6. Wat moet ons as kerk leer ten opsigte van ons taak vandag uit die kontras tussen 3 en 4?
7. Wat is veelseggend met betrekking tot die prediker Jona se afkoms en die feit dat die Assiriërs hom geglo het?
8. Lees vers 5. Wat leer ons hier oor die krag van die evangelie en watter troos hou dit vir ons in?
9. Wat kan ons uit die koning se woorde en optrede aflei ten opsigte van die egtheid van hulle geloof en berou? (Kyk vers 8)
10. Watter ironie sit daar in Jona se gesindheid waarmee hy die boodskap bring en die geweldige reaksie daarop?
11. Hoe vergelyk God se pad met Jona, sy profeet, en God se pad met Nineve en watter rol speel sy "kennis" van God hierin? Watter leer ons hieruit?

12. Wat moet ons aflei uit die koning se woorde “Miskien” sal God ons nie straf nie? Hoe het die heidense koning hierin meer begrip oor God geopenbaar as Jona?

13. Wat lei ons af van God se regverdigheid en genade – ook met ons - in 3:10?

BYBELSTUDIE RIGLYN 7

Jona se reaksie op Nineve se bekering Jona 4: 1 - 5

Ons het verlede keer gesien hoe Jona uiteindelik sy opdrag gaan uitvoer en hoe kragtig die boodskap wat hy gebring het, bekering by die koning en die inwoners van Ninevē bewerk het. Ons het ook gesien dat dit nie eers vir Jona nodig was om die hele stad deur te loop nie. Na eendag se prediking het die boodskap hom vooruitgeloop en het God deur sy Gees mense tot inkeer gebring.

Vandag kyk ons na Jona se reaksie op die “suksesvolle” sending-opdrag.

Opdrag: Lees Jona 4: 1 - 5

1. Waaroor was Jona so baie ontsteld?
 2. Wat sou die reaksie van die Nineviete wees toe die 40 ste dag aanbreek en geen verwoesting vind plaas nie?
 3. Hoekom was Jona baie ontsteld en baie kwaad? Let op die herhalende beklemtoning “baie”. (Dink aan sy persoonlike posisie as profeet en ook aan sy teologie.)
 4. In watter opsigte sondig ons ook dikwels op ‘n “Jona-manier” teen God?
 5. Wat kan ons aflei uit die feit dat Jona wel in sy woede en teleurstelling bid? Dink aan sy vorige reaksie nadat hy die opdrag die eerste keer ontvang het?
 6. Wat lei ons egter af van Jona se motiewe en sy teologie uit die inhoud van sy gebed in vers 2?
 7. Hoe gebeur dit in ons lewens dat ons ook nie die liefde en genade van God vir ander mense gun nie?
 12. Wat kan ons aflei uit vers 3 se gebedswoord oor Jona se siening van God se genade en sy lewe? Vergelyk dit ook met hf. 1: 12
 13. Watter genade sien ons die Here se woorde: “Het jy rede om kwaad te word”?
- 10 Hoe het ons hierdie genade ontvang en wat moet ons daarmee doen?

14. Watter ooreenkoms sien ons tussen hierdie gebeure en die verhaal van die verlore seun? Lees Matteus 21 : 28 – 32

BYBELSTUDIE RIGLYN 8 – JONA 4: 6 - 11

Die tragedie van Jona en ‘n Godsvraag wat in die lug bly hang...

Ons kom nou aan die einde van die boek Jona en in hierdie verse word die kernvraag van die boek baie skerp aan die orde gestel. Jona as simbool van die kerk word voor ‘n lewensbelangrike vraag gestel en elkeen van ons sal die vraag moet beantwoord.

Dit is ‘n vraag wat vandag nog net so aktueel en skerp bly staan. Uiteindelik word die tragedie van ‘n kerk met self gerigte teologie onthloot en dit opsigself laat baie vrae oor ons as kerk vandag. Tog is daar ook genade want God se vraag hang in die lug. Dis nog nie finaal nie, dis nog nie te laat nie, solank ons die regte antwoord gee en die regte antwoord doen.

Opdrag: Lees Jona 4: 6 - 11

Hierdie verse het ook weer ‘n spesifieke struktuur wat vir ons die kernvers aandui. Let ook op die wisselvorme in die Godsname wat gebruik word in Hebreus.

| STRUKTUUR | HEBREEUSE GODSNAAM | |
|--------------------------------------|--------------------|--------------|
| AFRIKAANS | | |
| A Jahwe-God beskik ‘n struikie 6a | Jahweh Elohim | die HERE God |
| B Jona is bly oor die struikie 6b | | |
| C “Die God” beskik ‘n worm 7 | HaElohim | “die” God |
| D God beskik ‘n wind 8a | Elohim | God |
| Jona wens dat hy kan sterf 8b | | |
| d Jona praat met homself 8c | | |
| c God praat met Jona 9a | Elohim | God |
| b Jona praat met God 9b | | |
| a Jahwe praat met Jona 10 – 11 | Jahweh | HERE |

Betekenis van Godsname:

Elohim: gewoonlik die Skepper God – die Almagtige

Jahweh: HERE: Ek is wat ek is – Die Verbondsnaam van God – die Naam waarmee

Hy hom aan mense verbind – ook aan Jona as ongehoorsame profeet.

Dit is interessant om daarop te let dat die eerste deel van die verhaal (A – D) sonder enige woorde afspeel. Dis eers na Jona se reaksie dat die gesprek tussen God en Jona begin. (d – a)

Besprekingsvrae:

1. Wat was Jona se gesindheid waarmee en sy bedoeling waarom hy buite die stad vir hom 'n skuiling bou? (Vers 5)
2. Wat was die Here se bedoeling met die klein wonder-“boompiepjie” (dubbele verkleiningsvorm in Hebreeus) wat die Here in eendag vir Jona laat opskiet?
3. Met watter natuurverskynsel het die Here Jona na sy vorige ongehoorsaamheid gekonfronteer en wat kan ons aflei uit die verskil tussen dit twee ten opsigte van die wyse waarop God met Jona werk en wat Hy vir hom wil leer?
4. Wat kan ons aflei uit Jona se “groot” blydskap oor die wonderboom tov sy denke oor God na die gebeurtenis?
5. Waarom stuur die Here die volgende more 'n worm en 'n groot warm wind om die boom te laat verlep?
6. Waarom reageer Jona met sy wens dat hy eerder maar moet sterwe. Tot watter konklusie het hy oor sy geloof in God gekom?
7. Wat leer ons hieruit ten opsigte van die omstandighede (beproewinge) waarin die Here ons ook dikwels laat kom?
8. Watter gesindheid openbaar Jona in vers 9 met sy antwoord aan God?
9. Wat leer ons uit die Here se antwoord aan Jona tov van ons eie kerk wees en elkeen van ons se eie siening van God en van wat Hy doen?
10. Watter reaksie wil die Here by ons ontlok met die feit dat die boek met 'n vraag afsluit?
12. Lees 1 Kor. 1: 25 – 27 ; Lukas 14: 26 ; Lukas 22: 25 – 26 en Fil. 2: 6 – 8 en kyk watter verband hou dit met die boodskap van die boek Jona
13. Watter groot les leer die Here dus vir ons as kerk met hierdie verhaal van Jona?
14. Hoe pas dit in ons Fokustydtema: Stap saam met Christus oor grense heen na verlore mense?
15. Hoe sal ons dit vandag moet toepas in ons eie lewe en in ons kerklike lewe?